



Կարգապահական գործ թիվ ԿԳ-17151

Հայաստանի Հանրապետության փաստաբանների պալատի խորհրդի
2018 թվականի հունվարի 17-ի թիվ 4-րդ ԿԳ նիստի

Ո Ր Ո Շ ՈՒ Մ ԹԻՎ ԿԳ/04-Ա

**ՓԱՍՏԱԲԱՆ ԴԻԱՆԱ ԳՐԻԳՈՐՅԱՆԻՆ ԿԱՐԳԱՊԱՀԱԿԱՆ
ՊԱՏԱՍԽԱՆԱՏՎՈՒԹՅԱՆ ԵՆԹԱՐԿԵԼՈՒ ՀԱՐՅՈՒ ՔՆՆԵԼՈՒ ՄԱՍԻՆ**
(ՎԵՐԱՊԱՏՐԱՍՏՄԱՆ ԴԱՍԸՆԹԱՑՆԵՐԻ ԳՈՐԾՈՎ)

Հայաստանի Հանրապետության փաստաբանների պալատի (**այսուհետ նաև՝ Պալատ**) խորհուրդը (**այսուհետ նաև՝ Խորհուրդ**), նիստը նախագահող՝ Մելանյա Առուստամյանի, Խորհրդի անդամներ՝ Հրանտ Անանյանի, Սեդրակ Ասատրյանի, Սիմոն Բաբայանի, Հարություն Հարությունյանի, Նելլի Հարությունյանի, Տիգրան Խուրշուդյանի, Արայիկ Ղազարյանի, Կարեն Սարգսյանի կազմով,
քարտուղարությամբ Նոննա Համբարձումյանի,
քննության առնելով փաստաբան Դիանա Գրիգորյանին (արտոնագիր՝ թիվ 717) կարգապահական պատասխանատվության ենթարկելու վերաբերյալ հարցը՝

Պ Ա Ր Զ Ե Ց

1. Կարգապահական վարույթ հարուցելու առիթը և հիմքը.

«Հայաստանի Հանրապետության փաստաբանական դպրոց» հիմնադրամի (**այսուհետ նաև՝ Դպրոց**) կողմից 30.10.2017թ. ներկայացված տեղեկանքի համաձայն՝ փաստաբան Դիանա Գրիգորյանը (**այսուհետ նաև՝ Պատասխանող**) 2017թ-ի առաջին կիսամյակի (հունվարից հունիս (ներառյալ)) ընթացքում չի մասնակցել պարտադիր վերապատրաստման դասընթացներին և չի լրացրել պարտադիր վերապատրաստման որևէ ժամ:

2. Կարգապահական վարույթ հարուցելու մասին որոշումը.

ՀՀ փաստաբանների պալատի նախագահի առաջին տեղակալի 07.11.2017թ. թիվ 401-Ա/ԿԳ-17151 որոշմամբ կարգապահական վարույթ է հարուցվել փաստաբան Դիանա Գրիգորյանի նկատմամբ՝ «Փաստաբանության մասին» ՀՀ օրենքի (**այսուհետ նաև՝ Օրենք**) 19-րդ հոդվածի 1-ին մասի 4.1 կետի, 45.12-րդ հոդվածի 2-

րդ մասի և Պալատի ընդհանուր ժողովի կողմից 11.02.2012թ. թիվ 1/4-Լ որոշմամբ հաստատված Փաստաբանի վարքագծի կանոնագրքի (**այսուհետ նաև՝ Կանոնագիրք**) 2.8.2 ենթակետի խախտման հատկանիշներով:

13.11.2017թ. կարգապահական գործը հանձնվել է Պալատի խորհրդին:

Խորհրդի նիստը տեղի է ունեցել 2018 թվականի հունվարի 17-ին, ժամը՝ 18:40-ին, ՀՀ փաստաբանների պալատի վարչական շենքում (ք.Երևան, Զաքիյան 7-2, 4-րդ հարկ, թիվ 12 սենյակ):

3. Պատասխանողի համառոտ բացատրությունը.

Փաստաբան Դիանա Գրիգորյանը բացատրություն չի ներկայացրել: Փաստաբան Դիանա Գրիգորյանը թեև պատշաճ ծանուցվել է կարգապահական նիստի վայրի և ժամի մասին, սակայն Խորհրդի նիստին չի ներկայացել: 17.01.2018թ. ժամը 18:24-ին էլեկտրոնային փոստով փաստաբան Դիանա Գրիգորյանից ստացվել է միջնորդություն, որով վերջինս միջնորդել է տրամադրել կարգապահական գործի նյութերի պատճենները և հետաձգել նշանակված նիստը՝ հնարավորություն ընձեռելով գործի ամբողջական նյութերին ծանոթանալու պայմաններում արտահայտելու դիրքորոշում:

Խորհուրդը, քննարկելով ներկայացված միջնորդությունը, արձանագրում է, որ կարգապահական վարույթ հարուցելու մասին որոշումը Պատասխանողը ստացել է դեռևս 16.11.2017թ. (ուղարկվել է նաև էլեկտրոնային փոստով 24.11.2017թ.), իսկ կարգապահական գործը վարույթ ընդունելու մասին որոշումը և խորհրդի նիստի վայրի, օրվա, ժամի մասին ծանուցումը՝ 29.11.2017թ.: Խորհուրդը գտնում է, որ Պատասխանողն ունեցել է ողջամիտ ժամանակ՝ մոտ երկու ամիս, գործի նյութերի պատճենները ստանալու և դիրքորոշում ներկայացնելու համար: Նշվածի հաշվառմամբ Խորհուրդը մերժում է միջնորդությունը:

4. Գործի հանգամանքները՝ առկա ապացույցների վկայակոչմամբ.

Պալատի խորհուրդը՝ ուսումնասիրելով գործում առկա գրավոր փաստաթղթերը, հաստատված է համարում հետևյալ փաստերը.

1) 2017թ. առաջին կիսամյակի (հունվար-հունիս (ներառյալ)) ընթացքում Պալատի, Դպրոցի և Պալատի կողմից սահմանված կարգով հավաքարմագրված կազմակերպությունների կողմից կազմակերպվել է 103 (մեկ հարյուր երեք) վերապատրաստման դասընթաց:

Նշված փաստը հաստատվում է Պալատի աշխատակազմի ղեկավարի և վերապատրաստման հարցերով համակարգողի 19.12.2017թ. տեղեկանքով:

2) 2017թ-ի առաջին կիսամյակի (հունվարից հունիս (ներառյալ)) ընթացքում չի մասնակցել պարտադիր վերապատրաստման դասընթացներին և չի լրացրել պարտադիր վերապատրաստման որևէ ժամ:

Նշված փաստը հաստատվում է Դպրոցի 30.10.2017թ. տեղեկանքով:

3) Փաստաբան Դիանա Գրիգորյանի նկատմամբ սահմանված կարգով և ժամաքանակով վերապատրաստման դասընթացներին չմասնակցելու հիմքով նախկինում կարգապահական վարույթ չի հարուցվել:

Նշված փաստը հաստատվում է Պալատի ընդհանուր դեպարտամենտի ղեկավարի կողմից 17.01.2018թ. տրամադրված տեղեկանքով:

5. Պատասխանողի անձը բնութագրող հանգամանքները.

Պալատի ընդհանուր դեպարտամենտի ղեկավարի կողմից 21.12.2017թ. տրամադրված տեղեկանքի համաձայն՝ փաստաբան Դիանա Գրիգորյանը փաստաբան է հանդիսանում 19.10.2007թ., և 2015-2018թթ. ընկած ժամանակահատվածում նրա նկատմամբ վերապատրաստման դասընթացներին չմասնակցելու հիմքով կարգապահական վարույթ չի հարուցվել (չհաշված Պալատի նախագահի առաջին տեղակալի ՀՀ փաստաբանների պալատի նախագահի առաջին տեղակալի 07.11.2017թ. թիվ 401-Ա/ԿԳ-17151 որոշմամբ հարուցված կարգապահական գործի):

6. Պալատի խորհրդի պատճառաբանված եզրակացությունը և որոշումը.

Հիմք ընդունելով Պալատի խորհրդի կողմից հաստատված փաստերը, դրանք հիմնավորող գործում առկա ապացույցները և քննարկվող իրավահարաբերությունները կարգավորող կանոնները, Պալատի խորհուրդը գտնում է, որ փաստաբան Դիանա Գրիգորյանին պետք է ենթարկել կարգապահական պատասխանատվության՝ հետևյալ պատճառաբանությամբ.

Փաստաբանների վերապատրաստման հետ կապված հարաբերությունները կարգավորվում են «Փաստաբանության մասին» ՀՀ օրենքի, Հայաստանի Հանրապետության փաստաբանների պալատի կանոնադրության, Փաստաբանի վարքագծի կանոնագրքի և Պալատի խորհրդի 18.12.2014թ. թիվ 35/8-Լ որոշմամբ նոր խմբագրությամբ հաստատված «Փաստաբանների վերապատրաստման» կարգի (այսուհետ՝ **Կարգ**) դրույթներով:

Օրենքի 19-րդ հոդվածի 1-ին մասի 4.1 կետի համաձայն՝ *փաստաբանը պարտավոր է՝ ... 4.1) սահմանված կարգով և ժամաքանակով մասնակցել սույն օրենքով նախատեսված վերապատրաստման դասընթացներին:*

Օրենքի 45.12-րդ հոդվածի 2-րդ մասի համաձայն՝ *փաստաբանը պարտավոր է անցնել փաստաբանների պալատի խորհրդի սահմանած կարգով և ժամաքանակով վերապատրաստման դասընթացներ, որոնք չեն կարող երկու տարվա ընթացքում քառասունութ ժամից պակաս լինել:*

Հայաստանի Հանրապետության փաստաբանների պալատի կանոնադրության 16.5 կետի 24-րդ ենթակետի համաձայն՝ *Պալատի խորհուրդը, որպես գործադիր մարմին հաստատվում է փաստաբանների վերապատրաստման կարգը:*

Կանոնագրքի 2.8.2 ենթակետը սահմանում է, որ *փաստաբանը պարտավոր է*

Պալատի խորհրդի կողմից սահմանված կարգով և ժամաքանակով մասնակցել օրենքով նախատեսված վերապատրաստման դասընթացներին:

Կարգի 1-ին կետի համաձայն՝ կարգը սահմանում է փաստաբանների վերապատրաստման դասընթացներ անցնելու ընթացակարգը, ժամկետները, ժամերի հաշվարկը, պատասխանատվության, հաշվետվողականության, ինչպես նաև վերապատրաստման հետ կապված այլ հարաբերությունները:

Կարգի 8-րդ կետի համաձայն՝ յուրաքանչյուր կիսամյակի (վեց ամսվա) համար փաստաբանը՝ Կարգով նախատեսված ժամկետում և ընթացակարգով, պետք է անցնի 12 (տասներկու) ակադեմիական ժամ (այսուհետ՝ ժամ, 1 (մեկ) ակադեմիական ժամը հավասար է 40 (քառասուն) րոպեի) վերապատրաստում: Կիսամյակի հաշվարկը՝ ա) սկսվում է հունվար ամսից և ավարտվում հունիսին (ներառյալ), կամ բ) սկսվում է հուլիս ամսից և ավարտվում դեկտեմբերին (ներառյալ):

Կարգի 27-րդ կետի համաձայն՝ կարգը խախտելու համար փաստաբանը ենթակա է կարգապահական պատասխանատվության՝ «Փաստաբանության մասին» Հայաստանի Հանրապետության օրենքով և Փաստաբանի վարքագծի կանոնագրքով սահմանված կարգով:

Նշված կանոնների վերլուծությունից հետևում է, որ փաստաբանը պարտավոր է անցնել վերապատրաստման դասընթացներ, որոնք չեն կարող երկու տարվա ընթացքում քառասունութե ժամից պակաս լինել, իսկ Պալատի խորհուրդը, որպես գործադիր մարմին, սահմանում է փաստաբանների վերապատրաստման կարգը և ժամաքանակը: Սահմանված ժամկետում վերապատրաստման դասընթացներին չմասնակցելու համար փաստաբանն ենթակա է պատասխանատվության:

Փաստաբան Դիանա Գրիգորյանի նկատմամբ սույն կարգապահական վարույթը հարուցվել է այն հիմքով, որ վերջինս, խախտելով Կարգի վերոնշյալ կանոնը, 2017թ. առաջին կիսամյակի (հունվարից հունիս (ներառյալ)) ընթացքում չի մասնակցել պարտադիր վերապատրաստման դասընթացներին:

Պալատի խորհուրդն արձանագրում է, որ 2017 թվականի հունվար-հունիս (ներառյալ) ամիսներին Պալատը կազմակերպել է 103 (մեկ հարյուր երեք) վերապատրաստման դասընթաց (չհաշված առցանց վերապատրաստման դասընթացները): Ընդ որում, թեմաները նախապես հաստատված և տեղադրված են եղել Պալատի կայքում, ինչպես նաև յուրաքանչյուր ամսվա դասացուցակները հաստատվել և տեղադրված են եղել Պալատի կայքում:

Պալատի խորհուրդն արձանագրում է, որ փաստաբան Դիանա Գրիգորյանն օբյեկտիվորեն ունեցել է հնարավորություն հաշվետու ժամանակահատվածում անցնելու տվյալ կիսամյակի համար պարտադիր 12 (տասներկու) ակադեմիական ժամ ժամաքանակով վերապատրաստման դասընթացները, սակայն չի կատարել օրենքով նախատեսված պարտականությունը և խախտել է «Փաստաբանության մասին» ՀՀ օրենքի 19-րդ հոդվածի 1-ին մասի 4.1 կետի, 45.12-րդ հոդվածի 2-րդ մասի և Կանոնագրքի 2.8.2 ենթակետի և Կարգի 8-րդ կետի պահանջները:

Նման պայմաններում Պալատի խորհուրդը գտնում է, որ փաստաբան Դիանա

Գրիգորյանը ենթակա է կարգապահական պատասխանատվության:

Խորհուրդը կարգապահական տույժ կիրառելիս հաշվի է առնում այն հանգամանքը, որ փաստաբան Դիանա Գրիգորյանը վերապատրաստման դասընթացներին չմասնակցելու համար առաջին անգամ է ենթարկվում պատասխանատվության:

Ելնելով վերոգրյալից, Պալատի խորհուրդը՝ ղեկավարվելով «Փաստաբանության մասին» ՀՀ օրենքի 10-րդ հոդվածի 5-րդ մասի 14-րդ կետի, 39-րդ հոդվածի 1-ին մասի, 39.7-րդ հոդվածի 5-րդ մասի 1-ին կետի, 39.9-րդ հոդվածի 1-ին մասի 1-ին կետի, «Հայաստանի Հանրապետության փաստաբանների պալատի կանոնադրության» 16.26-րդ կետի, «Փաստաբանի նկատմամբ կարգապահական վարույթի իրականացման» կարգի 30-րդ հոդվածի 5-րդ մասի 1-ին կետի պահանջներով, ինչպես նաև Կարգի պահանջներով՝

Ո Ր Ո Շ Ե Ց

1. Փաստաբան Դիանա Գրիգորյանի (արտոնագիր՝ թիվ 717) ճանաչել մեղավոր «Փաստաբանության մասին» ՀՀ օրենքի 19-րդ հոդվածի 1-ին մասի 4.1 կետի, 45.12-րդ հոդվածի 2-րդ մասի և Փաստաբանի վարքագծի կանոնագրքի 2.8.2 ենթակետի պահանջների խախտման համար:

2. Փաստաբան Դիանա Գրիգորյանի (արտոնագիր՝ թիվ 717) նկատմամբ կիրառել կարգապահական տույժ՝ նկատողություն:

3. Հանձնարարել Պալատի աշխատակազմի ղեկավարին՝ սույն որոշման մասին իրազեկել փաստաբան Դիանա Գրիգորյանին:

Ծանոթություն. *Սույն որոշումը կարող է բողոքարկվել դատական կարգով՝ այն ստանալու օրվանից մեկամսյա ժամկետում: Սույն որոշումն օրինական ուժի մեջ է մտնում սույն կետով նախատեսված բողոքարկման ժամկետն անցնելուց հետո:*

**ՀՀ փաստաբանների պալատի խորհրդի
կարգապահական գործով
նիստը նախագահող՝**

Մելանյա Առուստամյան

**17 հունվարի 2018թ.
թիվ ԿԳ/04-Ա
ք. Երևան**